

# Nagina tema da la Babilonia

**REGIUN** – LA SCOLA BILINGUA DA CUIRA CH'ERA VEGNIDA FUNDADA DAL 2000 HA ANC ADINA SUCCESS.



FOTO: FLURIN ANDRY

*Annalisa Schaniel da la Lia rumantscha e Franz Tscholl, il director da las scolas da Cuir, s'allegan dals buns resultats da la scola bilingua.*

Naschè era il project scola bilingua da l'onn 1994: La grupa da lavur «Sprachlandschaft Graubünden» aveva examinà quella giada la situaziun da lingua en il chantun Grischun ed inoltrà plirs postulats. «Ins aveva la finamira da stgaffir en la chapitala grischuna almain mintgamai ina classa bilingua taliana e rumantscha», declera Franz Tscholl, director da las scolas da Cuir. Causa l'interess da divers geniturs han ins dà la pussaivladad er ad uffants da famiglias monolinguas da frequentar questa scola. D'atun 2000 han ins cumenzà cun

duas emprimas classas tudestg-talian ed ina pitschna tudestg-rumantsch, uss han ins cuntanschì l'effectiv previs, nempe 12 classas bilinguas tudestg-talian e 3 tudestg-rumantsch. «Ils resultats intermediars da l'evaluaziun fatga en collavuraziun tranter auter cun la Lia rumantscha mussan ch'ils scolars cuntanschan almain uschè buns, sche na anc megliers resultats che uffants d'ina scola monolingua», di Tscholl. Perquai ha prolungà il cussegl da citad, cun la permischium dal Chantun, il project anc per trais ulteriurs onns. *anr/fa*